

相贝经〔汉〕朱仲撰

黄帝唐尧夏禹三代之贞瑞，灵竒之秘寶，其有次此者，贝盈尺，状如赤电黑云，谓之紫贝。素质红黑谓之朱贝，青地绿文谓之绶贝，黑文黄盖谓之霞贝。紫愈疾，朱明目，绶清气障，霞伏蛆虫。虽不能延龄增寿，其御害一也。

复又下此者：鹰喙蝉脊，以逐温去水，无竒功。贝大者如轮，文王得大秦贝，径半寻。穆王得其壳，悬于观。秦穆公以遗燕龟，可以明目远察，宜玉宜金。

南海贝：如珠砾，或白驳，其性寒，其味甘。

二水毒浮贝：使人寡无以近妇人，黑白各半是也。

濯贝：使人善惊无以亲童子，黄唇点齿有赤驳是也。

虽贝：使病疰黑鼻，无皮是也。

爵贝：使胎消，勿以示孕妇，赤带通脊是也。

慧贝：使人善忘，勿以近人，赤炽内壳赤络是也。

鬻贝：使童子愚女人淫，有青唇赤鼻是也。

碧贝：使童子盗，脊上有缕句唇是也，雨则重，霁则轻。

委贝：使人志强夜行伏迷鬼狼豹百兽，赤中圆是也。雨则轻霁则重。